

FONGTIL

Delegasaun Sossiedade Sivíl halo Reuniaun ho Prezidente da Repúblika Dr. Francisco Guterres Lu-Olo

Ajenda : Reuniaun ne'e rona Sossiedade Sivíl nia hanoin kona-ba lójika OGE 2019 nian.
Fatin: Palasíu Prezidente da Repúblika Ai-Tarak Laran. OTL: 14:00

Delegasaun Sossiedade Sivíl kompostu hosi organizasaun 8 (Ualu) maka hanesan : [FONGTIL](#), [La'o Hamutuk](#), [#HASATIL](#), [#HDMTL](#), [#TLCE](#), [#CGT](#), [#MDI](#), [Rede Feto](#). Reuniaun ne'e nudár inisiativa formal hosi Prezidente da Repúblika Dr. Francisco Guterres Lu-Olo tuir orden Konstituisaun ne'ebé hateten katak kada desizaun polítika ne'ebé sira ne'ebé iha nia ligasaun no sei korresponde ba interese povu nian, maka Prezidente da Repúblika tenke rona mós hanoin hosi públiku inklui mós sossiedade sivíl nian hanoin.

Ho razaun hirak ne'e maka Prezidente da Repúblika hola inisiativa hodi hasoru malu ho parte sossiedade sivíl, atu nune'e bele rona ho loos hanoin sira ne'ebé maka esklaresé hosi parte sossiedade sivíl. Iha biban seluk liga ho proposta Orsamentu Jerál Estadu ne'ebé maka submete hosi Parlamentu Nasional, boot tebes ho nia montante maka hanesan 2.1 biliaun. Ne'ebé tuir Prezidente da Repúblika katak, antes mós nia halo estudu no analiza ne'ebé kle'an ba submisaun sira ne'ebé maka halo hosi organizasaun sossiedade sivíl liga OGE 2019 Prezidente da Repúblika hateten ita tenke hare lójika orsamentu ne'e hosi nia dimensaun oin-oin.

Prezidente da Repúblika mós esklaresé kona-ba importánsia hosi OGE 2019 ne'ebé hodi bele solusiona problema ne'ebé maka povu hasoru, maibé Prezidente da Repúblika mós hateten katak alokasaun orsamentu uza hodi selu despezas, programa no mós rezolve problema sosiál ne'ebé maka povu enfrenta.

Prezidente da Repúblika mós hateten katak utilizaun Orsamentu Jerál Estadu tenke tuir mós nia regras normas sira ne'ebé maka tenke refleta mós tuir RSE. Prezidente mós sita kona-ba papél hosi Lei atividade petrolíferu no fundus Orsamentu ne'ebé maka mai hosi Fundus Petroleum ne'e tenke utiliza ba povu nia moris di'ak.

Iha biban seluk mós Prezidente da Repúblika hato'o mós nia preokupasaun kona-ba programa VIII governu Konstituisional nia hakarak hodi hola Asoens hosi Kompañia Shell ho Conoco Philips ne'e maka fó nia implikasaun maka ba montante OGE 2019 nian, no Prezidente da Repúblika mós husu hanoin hosi sossiedade sivíl kona-ba asuntu ne'e.

Iha reuniaun ne'e lidera hosi Prezidente da Repúblika rasik ho nia ekipa hodi hasoru delegasaun sossiedade sivíl ne'ebé maka lideransa hosi Diretór Ezekutivu Fongtil Daniel Santos Carmo ho papél hodi esklaresé hanoin no perspetiva hosi sossiedade sivíl Timor-Leste kona-ba lójika orsamentu jerál estadu 2019.

Iha reuniaun ne'e Diretór Ezekutivu Fongtil esklaresé hanoin sira ne'ebé maka iha nia ligasaun ho papél OGE2019, tuir sossiedade sivíl nia hanoin katak alokasaun Orsamentu Jerál Estadu 2019 nian, kontinua la tau importánsia ba setór importante sira hanesan :

- a. Saúde (2.1 %)
- b. Agrikultura (0,8%)
- c. Edukasaun (4,4%)
- d. Turizmu (0,4%)
- e. Be'e mós no Saneamentu (1%)

Hosi persentajen ne'ebé esklaresa iha leten tuir sosiedade sivíl nia hanoin katak ne'e montante ne'e maka la rasional no sei la rezolve hodi hadi'a povu nia moris, tanba setór hirak ne'e maka iha nia ligasaun ho povu nia moris.

Iha biban seluk mós sosiedade sivíl konsidera katak modelu dezvoltimentu petroleum ne'e sei la rezolve povu nia problema kuandu la halo balansu ba investe iha setór sira hanesan ne'e Saúde, Agrikultura, Edukasaun, Turizmu, Be'e mos. Sosiedade sivíl mós konsidera katak planu governu hodi hola Asoens hosi kompañia Shell no Conoco Philips ne'e la tama iha kategoria urjénsia no sei la iha nia sustentabilidade ba dezvoltimentu nasional.

Konkluzan.

Delegasaun nia prezensa iha reuniaun ho Prezidente da República ne'e hodi hatán ba konvite ne'ebé maka hato'o hosi Prezidente da República hodi rona sosiedade sivíl nia hanoin kona-ba lójika hosi OGE 2019.

Sosiedade sivíl mós la impoen buat id aba Prezidente da República, maibé parte sosiedade sivíl hato'o nia hanoin kona-ba alokasaun OGE 2019 no VIII governu Konstituisional konsentra dezvoltimentu ida ne'ebé ho orientasaun ba mega projetu sira.

Sosiedade sivíl mós halo analiza alokasaun OGE 2019 ne'e la korresponde ba deskobrementu ne'ebé maka halo liu hosi programa auditoria sosiál iha setór hanesan Edukasaun, Saúde, Agrikultura no Infrastrutura.



